

SINOPSIS RINGKAS

Isu ini telah diperkatakan lebih 2 tahun. Namun masih ramai yang keliru tentang hak penggunaan nama Allah di kalangan orang bukan Islam. Ini disebabkan wujudnya pandangan oleh segelintir agamawan yang digelar ulama yang mengatakan bahawa tiada dalil yang menyokong larangan penggunaan nama Allah oleh orang bukan Islam.

Dari sudut perundangan, istilah-istilah tertentu seperti kalimah 'Allah', 'Kaabah', 'Solat' dan 'Baitullah' telahpun 'digazetkan' sebagai khusus penggunaannya untuk agama Islam sahaja. Penggunaan nama Allah oleh orang bukan Islam dikhuatir akan menjurus kepada penyalahgunaan kalimah suci tersebut dan juga menimbulkan kekeliruan dalam masyarakat.

CABARAN DARI SISI PERUNDANGAN

Pada 31 Disember 2009, di dalam suatu penghakiman, Herald-The Catholic Weekly (sebuah majalah mingguan Kristian), telah diputuskan sebagai mempunyai hak untuk menggunakan nama 'Allah'. KDN kemudiannya mengemukakan rayuan terhadap keputusan tersebut kepada Mahkamah Tinggi itu. Sehingga kini hak penggunaan tersebut telah ditangguhkan oleh mahkamah.

Walaubagaimanapun, penghinaan dari pihak-pihak yang terus mencabar hak penggunaan kalimah Allah tidak berhenti di situ. Terbaru sekali pada pertengahan bulan Januari 2013. Tindakan biadap ini telah dilakukan melalui sebuah firma guaman terhadap sebuah badan agama negeri. Ini adalah pembohongan kepada masyarakat, walhal keputusan kes berkaitan masih belum muktamad.

PETISYEN DAN MEMORANDUM

PEMBELA membuat ketetapan mengusahakan petisyen dan memorandum kepada Raja-Raja Melayu dengan kandungan :

- Menyarankan Majlis Raja-Raja Melayu menetapkan agenda khas untuk perkara ini diperhalusi dan diputuskan tindakannya
- Tindakan tegas ke atas pihak yang terus-menerus mencabar hal ehwal berkaitan Islam menerusi kedegilan mereka membuat tuntutan penggunaan kalimah Allah untuk agama selain Islam
- Tindakan ke atas pihak yang tidak mempedulikan peruntukan undang-undang berkaitan kedudukan istimewa Islam dalam Perlembagaan Persekutuan
- Saranan mengeluarkan titah peringatan kepada pemimpin politik, terima larangan penggunaan di kalangan selain Islam sebagai mana menurut kedudukan undang-undang sedia ada

SOAL JAWAB

S : Apakah signifikannya isu ini sehingga PEMBELA dan ummah perlu ambil peduli isu ini ?

J : Respons dan kepedulian adalah perlu lantaran bahaaya kekeliruan, ketidakpastian dan ketidakharmonian yang boleh berlaku di kalangan masyarakat Muslim. Ini khususnya orang Melayu yang sememangnya memahami Islam melalui bahasa Melayu sebagai medium komunikasi utama.

S : Mengapa umat Islam mesti menentang penggunaan kalimah Allah oleh penganut bukan Islam ?

J : Isu penggunaan kalimah 'Allah' ini bukan sekadar suatu perebutan nama. Isu utama melibatkan kesejahteraan akidah, kefahaman falsafah dan maqasid di sebalik nama itu. Umat Islam tidak menentang sekiranya penganut agama lain mahu menisbahkan Allah kepada Tuhan yg sebenar berdasarkan pandangan kefahaman akidah Islam.

S : Tetapi musyrikin Makkah dan Arab pada zaman Rasulullah s.a.w juga menggunakan kalimah 'Allah' sejak sekian lama. Bapa Nabi (s.a.w) sendiri bernama Abdullah.

J : Memang benar musyrikin Arab telah menggunakan nama 'Allah' dalam merujuk kepada Tuhan, tetapi kefahaman mereka tidak semestinya betul. Bukanlah Rasulullah yang kita kasihii sudahpun menyampaikan kepada kita akan makna Allah yang sebenar ? Jadi, tidakkah kita sepatutnya mempertahankan makna yang sebenar ini ?

S : Tapi di dalam Al Qur'an Allah ada berfirman yang bermaksud "Dan sesungguhnya jika engkau (Wahai Muhammad) bertanya kepada mereka (yang musyrik) itu: siapakah yang menurunkan hujan dari langit, lalu dia hidupkan dengannya tumbuh-tumbuhan di bumi sesudah matinya? sudah tentu mereka akan menjawab: Allah. Ucapkanlah (Wahai Muhammad): Alhamdulillah (sebagai bersyukur disebabkan pengakuan mereka yang demikian), bahkan kebanyakan mereka tidak menggunakan akal (untuk memahami tauhid)" (al-Ankabut:63). Bukanlah kita disuruh mengucap Alhamdulillah bila bukan Islam mengaku Allah itu Tuhan. Jadi mengapa kita perlu menghalang perbuatan tersebut ?

J : Sebelum menggunakan mana-mana dalil naqli sangat penting untuk kita memahami asbabun nuzul (tujuan turun ayat). Ayat di dalam Surah Al-Ankabut di atas diturunkan semasa kaum Musyrikin Arab berada di sekitar Nabi (s.a.w)

Bukan kepada seluruh 'bukan Islam'. Sebab itulah Islam tidak membantah. Sebab itu juga Nabi (s.a.w) diperintah untuk mengucapkan syukur. Sebab musyrikin itu masih mengenali siapa Allah walaupun disyirikkan dengan menyembah berhala. Maka hal bersyukurnya Nabi (s.a.w) pada hal itu adalah benar. Ayat tersebut tidak memberikan keizinan atau membiarkan Kristian yang mengatakan Allah dan Jesus itu adalah satu. Adakah wajar kita bersyukur apabila Kristian mengatakan Allah Jesus yang menurunkan hujan dari langit ? Sekiranya kita mengizinkan hal sebegini, maka kesyukuran kita itu adalah kepada hal yang batil.

S : Tetapi bukankah Kristian Arab juga memakai kalimah 'Allah' di dalam Bible mereka ? Mengapa tiada pula mananya kerajaan di negara-negara Arab yang menghalang ?

J : Kebanyakan Kristian Arab yang memakai kalimah 'Allah' dalam terjemahan Bible (dipanggil Kitabul Muqaddas) adalah Kristian Unitarian. Yang percaya Allah itu Esa. Penganut Katolik Malaysia adalah Kristian Trinitarian yang mengiktiraf Allah itu mempunyai anak. Hakikatnya, Kristian Trinitarian sendiri mengafirkkan Kristian Unitarian. Nah, ternyata di kalangan mereka sendiri tiada kesepakatan yang membolehkan penggunaan nama 'Allah' bagi merujuk kepada Tuhan !

S : Tetapi penganut Kristian Indonesia juga memakai kalimah 'Allah' dalam Bible. Mereka Trinitarian juga. Indonesia masih lagi kekal negara Islam terbesar tanpa wujud masalah. Adakah kita mahu ditertawakan masyarakat Indonesia ?

J : Di Indonesia keadaan hidup beragama sudah menjadi agak liberal sehingga kebebasan menukar agama boleh dilakukan pada bila-bila masa. Di sana juga bukanlah menjadi sesuatu perkara pelik apabila di dalam sesebuah keluarga terdapat ayah, ibu serta anak-anak masing-masing menganut agama berlainan. Perkahwinan lintas agama (pasangan lain agama) juga berlaku di Indonesia. Tahukah anda di sana, ada premis hari Jumaatnya menjadi masjid, hari Sabtu menjadi kuil dan hari Ahad pula bertukar gereja? Kekalutan tidak berlaku di zaman ini, tetapi kasihanlah nasib anak cucu kita !

S : Kalau begitu, bererti juga beberapa lagu-lagu negeri harus ditukar kerana menggunakan kalimah 'Allah'?

J : Ini perbandingan kurang cerdik. Benar, bukan Islam ada menyanyikan lagu-lagu negeri. Tetapi konteks penggunaan lagu adalah betul dan tidak dihalang. Yang kita tak benarkan adalah penggunaan dalam bentuk salahguna. Malahan yang 'menggunakan kalimah Allah' sebenarnya adalah lagu itu.